

Fjármála- og efnahagsráðuneytið
Skrifstofa skattamála
Arnarhvoll við Lindargötu,
101 Reykjavík

Reykjavík 17. nóvember 2020

Efni: Umsögn um drög að frumvarpi um breytingu á ýmsum lögum um skatta og gjöld (skattalegir hvatar fyrir lögaðila sem starfa til almannaheilla).

Fagnað er þeim breytingum sem fyrirhugaðar eru í frumvarpsdrögum sem telja verður fullvíst að hafi jákvæð áhrif og verði samfélaginu öllu til heilla. Þakka ber vinnuhópnum fyrir þá vinnu sem lögð hefur verið í frumvarpsgerðina.

Þar sem drögin hafa verið lögð fram til samráðs vill þjóðkirkjan-biskupsstofa góðfúslega benda á eftirfarandi:

Í 8. gr. frumvarpsins er kveðið á um að hægt verði að sækja um endurgreiðslu á 60% af greiddum virðisaukaskatti af vinnu manna á byggingarstað við byggingu, viðhald eða endurbætur á mannvirkjum sem alfarið eru í eigu lögaðila sem starfa til almannaheilla að uppfylltum nánari skilyrðum.

Athygli er vakin á því að í bráðabirgðaákvæði XXXIV. í lögum um virðisaukaskatt nr. 50/1988 sem fjallar um tímabundnar heimildir til endurgreiðslu á virðisaukaskatti vegna vinnu á byggingarstað er einnig heimilt að óska eftir endurgreiðslu á virðisaukaskatti af þjónustu vegna hönnunar eða eftirlits með byggingu á slíku mannvirki. Um þessa heimild er nánar fjallað í h. lið 1. gr. reglugerðar nr. 690/2020.

Í greinargerð með frumvarpsdrögum er vísað til b. liðar 7. gr. laga nr. 25/2020 við skýringu á 8. gr. frumvarpsins. Í því ákvæði er bæði fjallað um vinnu á byggingarstað við byggingu, viðhald eða endurbætur á mannvirkjum auk vinnu við hönnun og eftirlit með byggingu á þeim.

Í ljósi þess að slíkur kostnaður er órjúfanlegur þáttur í byggingarkostnaði mannvirkja er bæði einfaldara og eðlilegra að virðisaukaskattur af vinnu við hönnun og eftirlit með byggingu falli undir sömu reglu og önnur vinna við byggingu mannvirkja sem byggð eru undir starfsemi til almannaheilla.

Til viðbótar þessu má benda á að til þess að styðja við starfsemi til almannaheilla væri bæði sanngjarnt og eðlilegt að umrædd endurgreiðsla væri einnig vegna kaupa á vöru (efniskaupa) ekki síður en keyptri þjónustu. Slíkt væri í fullu samræmi við tilgang lagafrumvarpsins og þess að þeir aðilar sem falla undir lögin geta hvorki nýtt sér innskatt af keyptri vöru né keyptri þjónustu.

Með vísan til sömu sjónarmiða má einnig benda á að æskilegast væri að endurgreiðsla á virðisaukaskatti tæki þannig til hans í heild í stað þess að ná aðeins til 60% af honum eins og frumvarpsdrögin gera ráð fyrir.

Virðingarfyllst,

f.h. þjóðkirkjunnar-biskupsstofu



Ásta Guðrún Beck lögfr.